



## Publicaziuns dalla vischnaunca, jamna 25

### Damonda da baghegiar

**Nr. 2013-1036.000**

Datum da publicaziun: ils 21 da zercladur 2013

**Il patron:** Linus Manetsch-Balet, Via Disla 19, 7180 Disentis/Mustér

**Il representant:** Linus Manetsch-Balet, Via Disla 19, 7180 Disentis/Mustér

**Object:** Engrondaziun dalla pergola e via d'access

- Ils plans da construcziun ein deponi tier l'administraziun communal.
- L'investa publica cuoza 20 dis dapi il datum dalla publicaziun.
- Eventualas protestas encunter sura damonda da baghegiar ein d'inoltrar a scret enteifer 20 dis alla istanza da baghegiar, caum postal 57, 7180 Disentis/ Mustér. La protesta sto esser motivada e sut-tascretta dil recurrent ni da siu representant.

Disentis/Mustér, ils 18-6-2013

*Uffeci da baghegiar Disentis/Mustér*

---

### Cussegl da vischnaunca

#### **Adattaziuns lescha davart ils dretgs politics, regulativ da fatschentas e credit per canalisaziun Sontget–Carcarola–Ual d'Acletta**

En sia seduta dils 14 da zercladur 2013 ha il cussegl da vischnaunca, sut il tgamun da Flavio Murer, approbau aschibein las adattaziuns dalla lescha davart ils dretgs politics sco era il regulativ da fatschentas. Quellas midadas ei stadas necessarias, a vesta che l'elecziun dalla cumissiun da gestiun succeda entras il suveran. La lescha davart ils dretgs politics vegn suttamessa al referendum facultativ.

Vinavon ha il cussegl da vischnaunca concediu in credit brut da frs. 296'000 per la canalisaziun Sontget – Carcarola – Ual d'Acletta. Per saver descargar la deflussiun dalla Via Sursilvana sco era dils quartiers Sontget, Chischliun, Scaletta e Carcarola ei quella investiziun necessaria. Il credit vegn suttamess al referendum facultativ.

La damonda per in credit supplementar per sanaziuns urgentas el Center da sport e cultura ei vegnida spustada dalla suprastonza communal. Quella fatschenta vegn tractada a caschun dalla proxima seduta dil cussegl da vischnaunca. A quella caschun vegn il parlament a prender investa dil Center da sport e cultura e schar informar dallas investiziuns realisadas.

*Suprastonza communal*

### **Referendum facultativ**

A caschun da sia seduta dils 14 da zercladur 2013 ha il cussegl da vischnaunca approbau la revisiun parziala dalla lescha davart ils dretgs politics e concediu in credit brut da frs. 296'000.-- per la canalisaziun Sontget - Carcarola - Ual d'Acletta.

Conform ad art. 21, lit. c sco era art. 36, lit. c dalla constituziun communal ein quellas decisiuns suttamessas al referendum facultativ. La lescha davart ils dretgs politics sco era il messadi davart la damonda da credit ein exponi per investa en casa communal (stanza nr. 10).

Sin proposta da silmeins 80 votants exista la pusseivladad d'inoltrar enviers sura conclus il referendum enteifer 20 dis dapi la publicaziun uffiziala.

*Suprastonza communal*

---



### **Temps da vacanzas – temps d'examinar ils documents da viadi**

Persunas che planiseschan da passentar lur vacanzas egl'exteriur ein supplicadas d'examinar a dretg temps lur documents da viadi (pass ni carta d'identitad). Per l'emissiun da novs documents sto vegnir quintau cun rodund 15 dis da spetga. Fagei quella cuorta controlla, buca che Vossas vacanzas entscheivan cun dagrettas.

*Administraziun communal Disentis/Mustér*

---

### **Viafier Matterhorn Gottard Lavurs da manteniment durant la notg**

Muort lavurs urgentas da manteniment vid ils binaris dil trassé dalla Viafier Matterhorn Gottard vegn luvrau durant las suandontas notgs sin il territori dalla vischnaunca da Mustér:

**mintgamai il gliendisdis/mardis notg entochen venderdis/sonda notg,  
naven dils 10 da zercladur entochen ils 3 d'uost 2013.**

Ei vegn dau breigia da reducir las immissiuns da canera sin in minimum.  
La Viafier Matterhorn Gottard engrazia ordavon per la capientscha.

Per ulteriur sclariment stat Guido Monn, menader d'infrastructura Ursera/Surselva, bugen a Vossa disposiziun.

*Administraziun communal*

---

### **Clom al survetsch da pumpiers**

Persunas che giavischan da prestar survetsch activ da pumpiers e da vegnir incorporadas da niev tier ils Pumpiers Sursassiala san s'annunziar a scret entochen ils 30 da zercladur 2013 tiel commando da pumpiers Sursassiala, Via Salez 11, 7186 Segnas.

Tenor lescha sa negin pretender d'astgar prestar survetsch activ. Decisivs ein liug da lavur e dimora, habilitad corporala e spirtala, tenuta da lavur e senn da responsabladad.

*Pumpiers Sursassiala*

---

### **Gasetta „Nossa scola“**

Preziai geniturs ed affons

Duas gadas ad onn rapportein nus ella gasetta „Nossa scola“ davart las activas dalla scola. Vus anfleis la pli nova ediziun sin nossa pagina d'internet [www.scoladisentis.ch](http://www.scoladisentis.ch).  
Bien divertiment tier la lectura

*Kai Hinrichsen, meinascola*

---



### **Apparats d'udida**

Gliendisdis, ils 24 da zercladur 2013 saveis Vus schar schubergiar e regular Vies apparat d'udida el Center da sanadad Sursassiala SA a Mustér che sesanfla en claustra ed a Curaglia. A Mustér ei il liug signalisau:

*a Mustér naven dallas 14.00–ca. las 15.15*  
*a Curaglia naven dallas 15.30–ca. las 16.30*

L'uniun Pro Audito Chur, cun signur Arthur Jacomet fa quei survetsch per tuts interessents gratuita-mein.

Cordiala invitaziun  
*Center da sanadad Sursassiala SA*